

BOSNA I HERCEGOVINA
Ministarstvo odbrane/obrane



БОСНА И ХЕРЦЕГОВИНА
Министарство одбране

**ETIČKI KODEKS PONAŠANJA VOJNIH LICA, KADETA I KANDIDATA NA OBUCI
U MINISTARSTVU ODBRANE I ORUŽANIM SNAGAMA BOSNE I HERCEGOVINE**

Sarajevo, januar 2019. godine



Na osnovu člana 52. Zakona o odbrani Bosne i Hercegovine („Službeni glasnik BiH“, broj: 88/05) i člana 16. stav (2) Zakona o upravi Bosne i Hercegovine („Službeni glasnik BiH“, broj: 32/02, 102/09 i 72/17), donosim

**ETIČKI KODEKS PONAŠANJA VOJNIH LICA, KADETA I KANDIDATA NA OBUCI
U MINISTARSTVU ODBRANE I ORUŽANIM SNAGAMA BOSNE I HERCEGOVINE**

**POGLAVLJE I
OPĆE ODREDBE**

**Član 1.
(Predmet)**

Etički kodeks ponašanja vojnih lica, kadeta i kandidata na obuci (u dalnjem tekstu: Etički kodeks) u Ministarstvu odbrane Bosne i Hercegovine (u dalnjem tekstu: MO BiH) i Oružanim snagama Bosne i Hercegovine (u dalnjem tekstu: OS BiH) utvrđuje osnovne standarde etičkog ponašanja vojnih lica, kadeta i kandidata na obuci u toku obavljanja službe i van službe.

**Član 2.
(Svrha)**

- (1) Etički kodeks utvrđuje osnovne etičke i profesionalne standarde ponašanja kojih su dužni da se pridržavaju vojna lica, kadeti i kandidati na obuci.
- (2) Etički kodeks afirmira dužnost i opredjeljenje vojnih lica, kadeta i kandidata na obuci u OS BiH, da službu vrše u skladu sa Ustavom, zakonima i normama međunarodnog humanitarnog prava.

**Član 3.
(Primjenjivost)**

Etički kodeks poštuju i primjenjuju sva vojna lica tokom službe u Bosni i Hercegovini ili inozemstvu, kandidati na obuci, kao i kadeti MO BiH za vrijeme školovanja u zemlji ili inozemstvu.

Član 4. **(Rodna ravnopravnost)**

Izrazi koji su radi preglednosti dati u jednom gramatičkom rodu, u smislu ovog Etičkog kodeksa donesenom na osnovu pravila bez diskriminacije, odnose se i na muškarce i na žene.

Član 5. **(Definicije)**

Izrazi korišteni u ovom Etičkom kodeksu imaju sljedeće značenje:

- (1) Mito je davanje ili obećavanje bilo kakve protivpravne koristi službenom licu, da bi svojim činjenjem ili nečinjenjem službene radnje ili korištenjem svog uticaja ishodilo materijalnu ili nematerijalnu korist za račun davatelja mita kome ta korist ne bi pripadala u redovnim prilikama.
- (2) Mobing je psihičko zlostavljanje na radnom mjestu koje se ponavlja putem radnji kojima je cilj ili posljedica degradacija uposlenikovih radnih uvjeta, kojim se mogu uzrokovati povrede ljudskih prava i ljudskog dostojanstva, nanijeti šteta fizičkom ili mentalnom zdravlju ili kompromitirati zaposlenikova profesionalna budućnost.
- (3) Poklon je svaki besplatni predmet, usluga, popust, zabavni sadržaj, izraz gostoljubivosti, zajam, odgoda plaćanja, a može uključivati prevoz, smještaj, obroke i slično. Pokloni uključuju poklone date bliskoj familiji pripadnika OS BiH (roditeljima, braći i sestrama, supružniku, djeci, unucima) zbog njihove rodbinske veze sa osobljem OS BiH.
- (4) Društvene mreže, u smislu ovog Etičkog kodeksa, podrazumijevaju vrstu internetskog servisa, koji se najčešće javlja u obliku platforme, prozora ili web-stranice, a koji služi za međusobno povezivanje i komunikaciju između korisnika.
- (5) Društveni mediji, u smislu ovog Etičkog kodeksa, su kategorija internetskog medija gdje lica komuniciraju, učestvuju u diskusijama, dijele datoteke, umrežavaju se i čuvaju linkove na internetu.
- (6) Uznemiravanje je svako neželjeno ponašanje po osnovu spola, kojim se želi povrijediti dostojanstvo osobe ili grupe osoba i stvoriti zastrašujuće, neprijateljsko, degradirajuće, ponižavajuće ili uvredljivo okruženje ili kojim se postiže takav učinak.
- (7) Seksualno uznemiravanje je svaki neželjeni oblik verbalnog, neverbalnog ili fizičkog ponašanja spolne prirode, kojim se želi povrijediti dostojanstvo osobe ili grupe osoba ili kojim se postiže takav učinak, naročito kad to ponašanje stvara zastrašujuće, neprijateljsko, degradirajuće, ponižavajuće ili uvredljivo okruženje.
- (8) Viktimizacija je oblik diskriminacije koji postoji kada se osoba ili grupa osoba dovede u nepovoljniji položaj zbog odbijanja naloga za diskriminatornim postupanjem, prijave

diskriminacije, svjedočenja u postupku zaštite od diskriminacije na osnovu spola ili ako je na bilo koji drugi način sudjelovala u postupku vođenom povodom diskriminacije na osnovu spola.

POGLAVLJE II ETIČKI STANDARDI

Član 6. (Načela)

Etički kodeks je zasnovan na sljedećim načelima:

- a) Zakonitosti,
- b) Profesionalnosti,
- c) Lojalnosti,
- d) Humanosti.

Član 7. (Standardi ponašanja)

(1) Vojna lica, kadeti i kandidati na obuci u MO BiH i OS BiH, obavezni su:

- a) U vrijeme obavljanja službe i van službe ponašati se u skladu sa Zakonom o odbrani BiH, Zakonom o službi u OS BiH, Kodeksom ponašanja i drugim zakonima i propisima.
- b) Postupati u interesu Bosne i Hercegovine, MO BiH i OS BiH, profesionalno obavljajući dužnosti i izvršavajući svoje zakonske i obaveze po naređenjima nadređenih.
- c) Poštivati zastave, himnu i vojna obilježja, u skladu sa odredbama poglavlja IX Zakona o odbrani BiH, te poštivati lično dostojanstvo sebi ravnih, nižih, viših, podređenih, nadređenih, i drugih lica na službi u MO BiH i OS BiH.
- d) Poštivati lično dostojanstvo i dignitet svih građana, bez diskriminacije po osnovu rasne, etničke, vjerske, spolne, socijalne, seksualne i političke pripadnosti.
- e) Savjesno čuvati i održavati, te racionalno i namjenski koristiti povjerene resurse.
- f) Prijavljivati eventualne pojave rasipništva, prevare, zloupotrebe, korupcije, diskriminacije i svakog drugog devijantnog i protivpravnog ponašanja u MO BiH i OS BiH za koja imaju saznanje.
- g) Pokazivati primjerenu kulturu i Etičkim kodeksom propisane standarde ponašanja na javnim mjestima.

(2) Vojnim licima, kadetima i kandidatima na obuci, nije dozvoljeno:

- a) Ostvarivati nezakoniti lični finansijski interes vršenjem službene dužnosti.
- b) Imati drugo zaposlenje ili učestvovati u drugim dodatnim aktivnostima bez odobrenja ministra odbrane Bosne i Hercegovine.

- c) U finansijskim transakcijama koristiti službene ili informacije zaštićene određenim stepenom tajnosti koje nisu ili ne smiju biti dostupne javnosti, ili koristiti takve informacije za ostvarivanje ličnih interesa.
- d) Neovlašteno davati obećanja kojima će obavezivati MO BiH i OS BiH.
- e) Neovlašteno koristiti službene prostorije i povjerena im sredstva radi ostvarivanja ličnih interesa.

(3) Vojna lica, kadeti i kandidati na obuci neće:

- a) Konzumirati duhan na javnim mjestima kada su u uniformi (na ulici, u pokretu, pred strojem, u stroju, na sastancima, savjetovanjima i slično).
- b) Nosit uniformu na nepropisan način na vojnim lokacijama i na javnim mjestima (držati ruke u džepovima, nositi kišobran, nositi najlonske i druge reklamne vrećice, žvakati žvakaću gumu u razgovoru i pred strojem, kombinirati vojne i civilne dijelove odjeće).
- c) U uniformi objedovati i piti na nepredviđenim mjestima, ulici, ispred javnih objekata, u sredstvima javnog prevoza i drugim mjestima koja nisu za to predviđena.
- d) Konzumirati alkohol za vrijeme službe ili tokom obavljanja dužnosti.
- e) Konzumirati druga opojna sredstava za vrijeme službe ili tokom obavljanja dužnosti i u vanradno vrijeme.
- f) U uniformi posjećivati objekte gdje se organiziraju igre na sreću (kladionice, kockarnice i sl.).
- g) Koristiti službene oznake, legitimacije ili autoritet službene pozicije u obavljanju privatnih poslova.
- h) Bilo kakvo neprimjereno ponašanje u toku službe i van službe kojim se narušava ugled pripadnika OS BiH.

Član 8. (Zabrane)

Vojnim licima, kadetima i kandidatima na obuci, strogo je zabranjeno:

- a) Svako uznemiravanje, segregacija, izdavanje naloga drugima za vršenje diskriminacije, podsticanje na diskriminaciju, kao i viktimizacija.
- b) Svako postupanje kojim se vrijeđa dostojanstvo podređenog ili nižeg po činu, postupanje koje je diskriminirajuće po spolu, seksualnom opredjeljenju, rasi, vjeroispovijesti ili nacionalnosti, a naročito seksualno zlostavljanje ili uznemiravanje.
- c) Vršiti mobing kao oblik maltretiranja, zlostavljanja i pokušaja eliminacije osobe za koju smatra da smeta.
- d) Korištenje službene pozicije za udvaranje i približavanje drugom vojnem licu, kadetu i kandidatu na obuci.
- e) Verbalna uznemiravanja neprimjerenum komentarima na temu seksa, seksualnim vulgarnostima, komentarima koji sugeriraju na seks, opisivanjem nečijih fizičkih karakteristika na seksualan način, kao i obraćanje nedoličnim riječima koje vrijedaju dignitet osobe, te slanje poruka seksualnog sadržaja bilo kojim sredstvom komunikacije.
- f) Neverbalna uznemiravanja (npr. neprimjereno zurenje, slanje poljubaca, namigivanje, neprimjerena gestikulacija i sl.).

- g) Neprimjereni fizički kontakti, kao što su: tapšanje, dodirivanje, grljenje, štipanje, namjerno sudaranje, blokiranje prolaza, ljubljenje, i sl.
- h) Uvjetovanje nečije karijere, napredovanja, povlastica i slično, u zamjenu za seksualne usluge, što obuhvata prijetnje nepovoljnim mjerama ako se neko lice ne poviňuje datim uvjetima, te obećanje da će uživati povlastice ako se poviňuje postavljenim uvjetima.
- i) Intimni kontakt i seksualni odnos u službenim prostorijama (kancelarije, kasarne, vojni objekti u zemlji i inozemstvu koje koriste pripadnici MO BiH i OS BiH za vrijeme rada, obuke ili izvršenja zadatka).
- j) Javno pokazivanje tijela ili dijelova tijela na neprimjereni način i ponašati se na način koji se kvalificira kao moralno neprihvatljiv.
- k) Biti članom ili promovirati stavove, ideologiju i obilježja organizacija ili udruženja koje promoviraju netrpeljivost prema drugim licima/grupama na osnovu etničke, nacionalne, vjerske, rodne, socijalne ili političke različitosti.
- l) Učestvovati na događajima ili aktivnostima na kojima se negira ili povrjeđuje ustavno uređenje, teritorijalni integritet ili suverenitet Bosne i Hercegovine, državna obilježja i simboli, ili iz kojih proizilaze poruke mržnje ili se izražava netolerancija prema drugima.
- m) Promovirati ili na bilo koji način komentirati lik i djela lica optuženih ili osuđenih za najteže povrede međunarodnog humanitarnog prava.
- n) Vrijedati, negirati ili omalovažavati događaje od posebnog pijeteta za konstitutivne ili ostale narode i građane u BiH.
- o) Korištenje javnog prostora na društvenim mrežama i društvenim medijima za promoviranje načela zabranjenih u prethodnim tačkama iz ovog člana.
- p) Iстicanje na društvenim mrežama i društvenim medijima neafirmativnih fotografija, video zapisa i tekstova u vezi sa stanjem i odnosima u MO i OS BiH.

Član 9. (Profesionalni odnosi)

- (1) Vojna lica, kadeti i kandidati na obuci, gajit će visoku svijest da nedolični odnosi između različitih kategorija vojnih lica mogu narušiti profesionalne odnose u službi. U uvjerenju da je vojni poziv ne samo profesija nego i način života, sva vojna lica, kadeti i kandidati na obuci, moraju generirati visoke vrijednosti i načela zakonitosti, lojalnosti, profesionalizma i humanizma u svakom segmentu života i rada.
- (2) Vojna lica u odnosu nadređeni-podređeni neće posuđivati novac međusobno. Pored navedenog, viši po činu neće posuđivati novac od nižeg po činu, bez obzira na kategoriju kojoj pripada.
- (3) Vojna lica, kadeti i kandidati na obuci, neće imati odnos koji se kvalificira kao preljuba.
- (4) Vojna lica u odnosu nadređeni-podređeni, neće započinjanti ili održavati sljedeće oblike emotivnog odnosa:
 - a) Ljubavnu vezu,
 - b) Intimne i seksualne odnose.

(5) Izuzetno, ukoliko dođe do uspostave veze u smislu stava (4) ovog člana, na relaciji nadređeni-podređeni, koja može rezultirati bračnom ili vanbračnom zajednicom, iz razloga očuvanja načela nepristrasnosti i objektivnosti u sistemu komandovanja, podređeni će zatražiti premještaj izvan iste komande, organizacijske jedinice ili jedinice ranga bataljona.

Član 10. (Sukob interesa)

(1) Vojna lica, kadeti i kandidati na obuci na službi u MO BiH i OS BiH, u obavljanju privatnih i službenih poslova dužni su da se ponašaju na takav način da izbjegnu sukob između njihovih profesionalnih dužnosti i privatnih, političkih i finansijskih interesa.

(2) Aktivnosti koje nisu dozvoljene vojnim licima, kadetima i kandidatima na obuci:

- a) Biti angažiran u političkim aktivnostima političkih stranaka, biti član političkih stranaka, aktivno učestvovati na skupovima organiziranim od strane političkih stranaka, promovirati ili uticati na druge u cilju promoviranja aktivnosti političkih stranaka.
- b) Biti imenovan i angažiran na dužnost u javnim i privatnim preduzećima na poziciji predsjednika i članova upravnih odbora, poslovodnih odbora, nadzornih odbora, izvršnih odbora, raznih komisija koje nisu u vezi sa službom.
- c) Koristiti službene prostorije i resurse, funkciju ili položaj za potrebe ličnog dodatnog angažmana, kao i obavljati dodatno lično angažiranje u toku propisanog radnog vremena za subjekte izvan sistema odbrane BiH.
- d) Uticati svojim položajem ili funkcijom na sklapanje ugovora, davanje olakšica, davanje podataka i službenih informacija za firme i druge subjekte radi favoriziranja istih, a sa ciljem sticanja protivpravne koristi za sebe i druge.
- e) Da, po osnovu članstva u upravama, vlasničkog i suvlasničkog odnosa u firmama koje posluju sa MO BiH, imaju uticaj na postupak koji se vodi između tih subjekata i MO BiH i OS BiH. Ukoliko dođu u poziciju da mogu uticati na predmetni postupak, obavezni su da to prijave u svakoj fazi postupka.
- f) Sklapati ugovore o pružanju ličnih usluga sa javnim preduzećima, kao i ugovore o pružanju ličnih usluga sa privatnim preduzećima koji posluju sa MO BiH i OS BiH.
- g) Biti dodatno privatno angažiran na taj način da to angažiranje direktno utiče na obavljanje njegovih redovnih službenih dužnosti.

(3) Aktivnosti koje su dozvoljene vojnim licima, kadetima i kandidatima na obuci:

- a) Angažiranje na dodatnim aktivnostima u vanradno vrijeme, pod uvjetom da za to angažiranje postoji saglasnost ministra odbrane Bosne i Hercegovine.
- b) Vojno lice, kadet i kandidat na obuci, prilikom odobrenog dodatnog angažiranja, može koristiti naziv svoga čina, ali se neće pozivati na svoj službeni položaj, niti nastupati u ime ili predstavljati zvanične stavove MO i OS BiH ni u kojem smislu.

(4) Kako bi izbjegli sukob interesa, vojnim licima, kadetima i kandidatima na obuci, posebno se zabranjuje:

- a) Korištenje njihovog zvaničnog položaja u svrhu nagovaranja, vršenja pritiska ili bilo kakvog uticaja na pojedince, organe i tijela, kako bi ostvarili ličnu korist finansijske ili druge prirode za sebe ili druge.
- b) Da imaju finansijske interese koji su u sukobu sa savjesnim obavljanjem njihovih dužnosti.
- c) Angažman na drugim dodatnim aktivnostima ili bilo kojim aktivnostima koje su u sukobu sa zvaničnim dužnostima i odgovornostima.
- d) Pokušaj da utiču na javne zvaničnike kako bi ostvarili ličnu korist.
- e) Korištenje povjerene imovine za sticanje lične koristi, ili u bilo koju drugu svrhu osim odobrene.

Član 11. (Pokloni)

(1) Vojna lica, kadeti i kandidati na obuci, neće tražiti ili davati poklone, bilo direktno ili indirektno, niti ih primati kao protuuslugu za činjenje ili nečinjenje službenih radnji ili zbog korištenja uticaja koji mu omogućava njegov službeni položaj.

(2) Vojna lica, kadeti i kandidati na obuci, neće primati i navoditi nekoga da primi poklon od pravnog ili fizičkog lica, koje od MO BiH i OS BiH traži izvršenje određenih aktivnosti koje podrazumijevaju korištenje resursa.

(3) Vojna lica, kadeti i kandidati na obuci, izuzetno, mogu prihvati poklone pod sljedećim okolnostima:

- a) U ime Bosne i Hercegovine, MO BiH ili OS BiH poklone ponuđene od zvaničnih predstavnika strane zemlje, a takvi pokloni postaju zvanično vlasništvo Bosne i Hercegovine, osim u nekim ograničenim izuzecima utvrđenim propisom koji donese ministar odbrane Bosne i Hercegovine.
 - b) Poklone ili protivvrijednost u smislu čašćenja koja ne prelaze 100,00 KM prilikom protokolarnih, bilateralnih ili ceremonijalnih aktivnosti nakon završetka edukativnih ciklusa, vježbi ili projekata civilno-vojne saradnje.
- (4) Svi pokloni ili čašćenje iz stava (3) ovog člana prijavljuju se nadređenom, koji će postupiti u skladu sa procedurama donesenim od ministra odbrane Bosne i Hercegovine.
- (5) Vojna lica, kadeti i kandidati na obuci, mogu primati sljedeće poklone unutar vojne organizacije:
- a) Hranu, tople i hladne napitke male vrijednosti.
 - b) Nagrade i priznanja u skladu sa važećim pravilnicima.

- c) Poklone od podređenih ili za podređene, u prilikama kao što su: unaprjeđenje, penzioniranje, promjene komandne strukture ili drugi profesionalni uspjesi, vjenčanja, rođendani, ispraćaji, godišnjice i slični događaji, sve dok ukupna tržišna vrijednost svih poklona zajedno ne prelazi iznos od 400,00 KM. Ni jedan pojedinac ne može platiti ili dati doprinos u iznosu većem od 20,00 KM za pojedinačni ili grupni poklon.

Član 12.
(Javna istupanja)

- (1) Vojnim licima, kadetima i kandidatima na obuci, zabranjeno je javno istupanje u vezi sa stanjem i odnosima u MO BiH i OS BiH, bez pisanog odobrenja ministra odbrane Bosne i Hercegovine.
- (2) Vojna lica, kadeti i kandidati na obuci, mogu davati izjave za medije bez odobrenja ministra odbrane o okolnostima koje se ne odnose na aktivnosti MO BiH i OS BiH, aktivnosti političkih stranaka i organa vlasti.

Član 13.
(Političke i javne aktivnosti)

U smislu člana 48. Zakona o odbrani BiH, pripadnicima OS BiH je zabranjeno:

- a) Korištenje službenih ovlasti ili uticaja sa ciljem miješanja u izbore, uticaja na ishode izbora, traženje glasova posebnim kandidatima ili pitanjima, zahtijevanje i traženje političkog doprinosa od drugih.
- b) Učestvovanje u objavljuvanju političkih članaka, pisama ili pisane podrške od pripadnika koji traži glasove za ili protiv političke stranke ili kandidata.
- c) Služenje na oficijelnim pozicijama ili biti na listi kao sponzor političke stranke ili bilo kojeg ogranka, asocijacije ili strukture političke stranke.
- d) Govoriti na političkim skupovima, uključujući bilo kakva okupljanja koja promoviraju političke stranke ili kandidate.
- e) Učestvovanje u bilo kojem radio, TV ili drugom programu ili grupnom razgovoru, kao zaštitnik ili protivnik političke stranke ili kandidata.
- f) Promoviranje političkih događaja radi prikupljanja sredstava.
- g) Prisustvovanje političkim događajima ili aktivnostima u uniformi.
- h) Promovirati lično ili preko društvenih medija političke stranke, kandidate političkih stranaka, političke skupove i druge aktivnosti političkih stranaka ili kandidata političkih stranaka.

Član 14.
(Odgovornost)

- (1) Rukovodioci organizacijskih jedinica MO BiH, komandanti i komandiri na svim nivoima, odgovorni su za distribuciju ovog kodeksa u naredbodavnoj formi do svakog vojnog lica u njihovim organizacijskim cjelinama. Svako vojno lice potpisat će izjavu o upoznavanju i obavezi poštivanja odredbi Etičkog kodeksa.
- (2) Povreda Etičkog kodeksa povlači disciplinsku odgovornost, u skladu sa Zakonom o službi u OS BiH i Pravilnikom o vojnoj disciplini i disciplinskom postupku.
- (3) Svi kadeti ili kandidati na obuci, po otpočinjaju procesa školovanja ili obuke, bit će upoznati s odredbama Etičkog kodeksa, i obavezi poštivanja odredbi istog, što će biti sastavni dio ugovora o statusu navedenih lica.
- (4) Rukovodioci organizacijskih jedinica MO BiH i komandanti na svim nivoima odgovorni su za provođenje obuke iz etičkog ponašanja i dosljedno poštivanje odredbi Etičkog kodeksa.

POGLAVLJE III
PRELAZNE I ZAVRŠNE ODREDBE

Član 15.
(Pregled i ažuriranje)

- (1) Pregled i, po potrebi, ažuriranje Etičkog kodeksa vrši se jednom godišnje. Ažuriranje Etičkog kodeksa vrši Generalni inspektorat MO BiH.
- (2) Izjavu o upoznavanju i obavezi poštivanja odredbi Etičkog kodeksa, u prilogu, nakon potpisivanju od vojnih lica, uložiti u vojnu evidenciju o izvršenju dužnosti vojnih lica (Prilog broj 1).

Član 16.
(Savjetnik za etiku)

- (1) Savjetnika za etiku određuje komandant komande ili jedinice nivoa brigade i više u OS BiH.
- (2) Savjetnik za etiku iz stava (1) ovog člana sprovodi aktivnosti i obuku iz oblasti etike i profesionalizma u OS BiH.

Član 17.
(Nadzor nad provođenjem kodeksa)

Nadzor nad provođenjem ovog Etičkog kodeksa provodi Generalni inspektorat MO BiH i inspektori u OS BiH.

Član 18.
(Stupanje na snagu)

- (1) Ovaj Etički kodeks stupa na snagu danom donošenja.
- (2) Stupanjem na snagu ovog Etičkog kodeksa, stavlja se van snage Etički kodeks ponašanja vojnih lica u MO i OS BiH, broj: 05-03-32-1-52-14/13 od 30.12.2013. godine.

Broj: 05-03-32-2168-31/18

Datum: 19.02.2019. godine

MINISTRICA
Marina Pendeš



BOSNA I HERCEGOVINA
Ministarstvo odbrane/obrane
Zajednički štab/stožer OS BiH



БОСНА И ХЕРЦЕГОВИНА
Министарство одбране
Заједнички штаб ОС БиХ

Broj:

*PREDMET: Izjava o upoznavanju s odredbama i obavezi
poštivanja načela Etičkog kodeksa*

Na osnovu člana 14. Etičkog kodeksa o ponašanju vojnih lica, kadeta i kandidata na obuci u MO i OS BiH, u vezi člana 52. Zakona o odbrani BiH („Službeni glasnik BiH“, broj: 88/05), svojevoljno dajem i vlastoručno potpisujem sljedeću

I Z J A V U

U cijelosti sam upoznat s odredbama Etičkog kodeksa o ponašanju vojnih lica, kadeta i kandidata na obuci u MO i OS BiH. U svijesti i uvjerenju da je vojni poziv ne samo profesija, nego i način života, te da u svakom segmentu života moram promovirati načela zakonitosti, profesionalizma, lojalnosti i humanosti, ovom Izjavom se obavezujem, a vlastoručnim potpisom potvrđujem, da ću ta načela poštivati svojom profesionalnom službom i životom općenito.

Svjestan sam da kršenje Etičkog kodeksa može rezultirati ne samo moralnom, nego i disciplinskom odgovornošću, te izjavljujem da sam spremjan suočiti se s tim konsekvenscama ukoliko odstupim od gore spomenutih načela.

U Sarajevu, dana _____.2019. godine

IZJAVU DAO:

(čin, ime i prezime, vlastoručni potpis)

Dostavljeno:

- Arhivi,
- Imenovanom,
- VEoID.